

ԱՐՐԱՀԱՄ ԿՐԵՏԱՑԻ

Պատմ. գիտ. դոկտոր Լ. Ն. ԲԱՐՍԱՆ

XVII դարի վերջում և XVIII դարի մոտ շորս տասնամյակներում ապրած պատմադիր Աբրահամ Կրետացու մասին կենսագրական տվյալներ չեն պահպանվել. հայտնի չեն ծննդյան թիվը, ուսումնառության հանգամանքները, երբ և ում կողմից է ստացել վարդապետական ու եպիսկոպոսական աստիճանները և այլն: Մական գիտենք, որ նա ծնվել է Կրետեի Կանդիա քաղաքում: Երկու տարվա իրադարձությունների մասին իր գրած օրագրից, ավելի ճիշտ անձնական հիշատակարանից (որը նրա հրատարակիչները խորագրել են «Աբրահամ կաթողիկոսի Կրետացու պատմագրութիւն անցիցն իւրոց եւ Նատր-Շահին Պարսից»)¹, իմանում ենք, որ ինքը 25 տարի եղել է Թնքիր-դաղի (Հոռոս) հայոց հոգևոր առաջնորդ, 1734 թ. որպէս ուխտավոր եկել է էջմիածին Աբրահամ Բ կաթողիկոսի ժամանակ և նույն տարում, կաթողիկոսի մահից հետո, հակառակ իր կամքի, հաջորդել է նրան: Սիմեոն Երեւմացու «Ջամբուից» էլ իմանում ենք, որ Աբրահամ կաթողիկոսն «էր մեծանձն և խելօք, ճարտարալեզու և հանճարեղ... քան զամենեւեմ առանկաւ արար գրաբարութիւնս և զօգոստս սրբոյ Արուստյս և ազգիս և բոլոր երկրիս մերոյ... զբաղումս ազատեաց ի մահուանէ, զշատս իջոյց ի կախաղանէ, զբաղմաց աշսն և զականջսն և զայլ անգամսն ազատեաց ի հատանելոյ և ի բրելոյ: Զանհամար գերիս ազատեաց ի գեղիչաց, և զբաղումս զորս տաճկացուցեալ էին կամաւ և թէ բռնութեամբ. յետս դարձոյց և առ ի ձեռաց այլազգեաց: Եւ զայլ անհամար բարերարութիւնս արար Տաճկաց, Հայոց, Պարսից, Օսմանցւոց: ... Ապա ի ՌՃՁԵ թուին հանգեաւ ի Տէր և սուգ մեծ էած ի վերայ բոլոր երկրիս արեւելեան. և թաղեցաւ ի Շողակաթի ի ձախակողմն գաթին. որոյ յիշատակն օրհնութեամբ եղիցի: Ունի և զգրեանս օղտարարս արքունական և դատաւորական հոգացեալ, զորս յետոյ գրեսցուք: Սա թէ իւր և նոյն ժամանակի անցից պատմութիւնն ինքնին յատուկ ունի գրեալ»²:

Կրետացու մեղ թողած անձնական հիշատակարանը հավաստում է Սիմեոն կաթողիկոսի տված բնութագիրը նրա մասին:

Այդ անձնական հիշատակարանում նկարագրված են քաղաքական բուռն իրադարձություններ ընդգրկող ժամանակաշրջանում Աբրահամ Կրետացու կյանքում ընդամենը երկու տարվա ընթացքում տեղի ունեցած անցքերը, զրի են առնված նրա հանդիպումները Նադիր-շահի հետ, այդ հանդիպումների արդյունքները, ճանապարհորդությունը դեպի Մուղան և վերադարձը:

¹ «Աբրահամ կաթողիկոսի Կրետացու պատմագրութիւն անցիցն իւրոց եւ Նատր-Շահին Պարսից», Վաղարշապատ, 1870: Կրետացու Պատմության քննական բնագիրն ու ռուսերեն թարգմանությունը առաջարկով և ծանոթագրություններով հրատարակել է Ն. Կ. Ղորանյանը՝ Абраам Кретацци, Повествование, Ереван, 1973.

² Սիմեոն Երևմացի, Ջամբու, Վաղարշապատ, 1873, էջ 30—31:

Նկարագրված են նադիրի թագադրման արարողությունները Մուղանի դաշտում, պարսկական բայրամի՝ կրոնական տոնի ծիսակատարությունները: Օրագիրը հետաքրքիր տեղեկություններ է պարունակում պարսկական պալատական կանոնների, վարչակարգի, բանակի կառուցվածքի ու սպառազինման, պարսից բարքերի, նիստուկացի, ինչպես նաև պարսկա-թուրքական վերջին կոիվների, հատկապես 1735 թ. հղվարդի ճակատամարտի մասին: Այդ բոլորը գրված են ականատեսի և, որ զխավորն է, գործող անձի կողմից:

Կրետացին հավաստում է մեզ, որ ինքը գրել է Նշմարիտ պատմություն: Գրվածքի վերջում կարդում ենք. «Այս պատմության խնդրի ի ընթերցողաց սիրելի որդուց իմոց, զի վասն երկարաբանության և պարզաբան լինելոյն անմեղադրելի ունել զմեզ, զի որքան իմ կարն էր՝ ջանացի, որ կարճ համառոտ և պարզ լիցի՝ առ ի հասկանալ ամենայն ումեք. զի եթէ ամենայն անցս մի ըստ միոջէ գրեալ լինէի, ոչ քարտէզ և ոչ մեկան բաւական լիներ, այլ այսքան գրեցաւ, զի ցանկացողք առ ի յիմանալ զանցս և զորպիսութիւնս սուրբ Աթոռոյս և զիմ, ահա այս ճշմարիտ պատմութենէս վերահասու լիցի և զովասցի. և եթէ ըստ հաճոյից ձերոց իցէ... ապա թէ ոչ ներեցէք իմում դանդաղութեանս, զի ի մէջ տառապանաց և ի մէջ զբաղմանց վշտաց, և շարշարանաց, և նեղութեանց գրեցի, հիւանդ՝ և խօթացեալ՝ անզօր անձամբ...»³:

Մ. Աբեղյանը գտնում է, որ «այդ պատմությունն իսկապես պատմութիւն չէ, այլ անձնական հիշատակարան (memoires), և իբրև այդպիսին՝ մեր պատմության մեջ մի առանձին տեղ է բռնում և, կարելի է ասել, եղակի է իր տեսակի մեջ, քանի որ մեզանում պատմական հիշատակարաններ շատ չկան: Աբրահամը մանրամասն արձանագրում է այն, ինչ որ ինքն արել ու գործել, կամ մտածել է, շատ քիչ բան՝ ուրիշներից լսած: Հենց այդ պատճառով ևս Աբրահամի հիշատակարանը շատ հետաքրքիր է, նա ուրիշներին նկարագրելով հանդերձ՝ դարձյալ ավելի ինքն իրեն է նկարագրում, յուր ճաշակը, հասկացողությունները, առաքինություններն ու արիությունը»⁴:

* * *

Ինչպես ասվեց, Աբրահամ Կրետացին 1734 թ. որպես ուխտավոր գալիս է էջմիածին, մեծ փափագ ունենալով գնալ Տարոնի Ս. Կարապետ և այլ վանքեր, սակայն Աբրահամ Բ կաթողիկոսը, որին առաջին իսկ պահից Կրետացին շատ էր դուր եկել, թույլ չի տալիս և պահում է նրան իր մոտ: Իր հիշատակարանում Կրետացին գրում է, որ կաթողիկոսի և միաբանների հետ գնացել են Հովհաննավանք, սակայն երկար չեն մնացել այնտեղ, «զի նրբահայեաց գոլով Վեհն և յոյժ ցաւեցող վասն ամենեցուն, ոչ կամէր բնաւ զձանձրանալն ումեք. վասնորոյ աճապարէր դառնալ ի սուրբ Գահն, մանաւանդ զի էր և ժամանակն խառնակ. և ազգի ազգի զրոյցք գային ի լսելիս Վեհին՝ վասն գալստեան Թահմազխանին, և շարժել զօրացն Պարսկային. փութացաւ զդարձն անդրէն առ սուրբ Աթոռն, զի նոգասցէ զհոգս ամենեցուն»⁵:

³ Կրետացի, էջ 90:

⁴ Մ. Աբեղյան, Հայոց հին գրականության պատմություն, հատ. II, Երևան, 1946, 459:

⁵ Կրետացի, էջ 4:

Կրետացին ողբում է Աբրահամ կաթողիկոսի մահը և նշում, որ իրեն կանչել են Նրեանի փաշայի մոտ և հարկադրել ստանձնել կաթողիկոսությունը. «Իսկ ես հրաժարեալ,— գրում է նա,— յայնմանէ՝ սկսայ ասել. թէ չեմ քաւական այդմ զործոյ, և ոչ ունիմ կարողութիւն յամենայն կողմանց, մանաւանդ զարիւլ և օտուս եմ»⁶: Սակայն փաշան անդողվելի է մնացել: «Եղին ի ծառայութիւն և ի ներքոյ լծոյ սուրբ էջմիածնի և Աթոռոյն մեծի սուրբ հօրն մերոյ Գրիգորի Լուսաւորչին. որ էր թուականն մեր ՌՃՁԳ»⁷,— գրում է Կրետացին:

Այս կապակցութեամբ նա հաղորդում է տեղեկութիւններ, որոնք պատմական առումով չափազանց արժեքավոր են ու կարևոր: Նա հաստատում է Առաքել Դավրիթեցու այն վկայութիւնը, որ հայ առևտրական կապիտալի ներկայացուցիչները վճռական դեր են խաղացել հայ հասարակական կյանքում, նա գրում է, թե երբ իրեն ստիպել են ստանձնել կաթողիկոսությունը, ասել է, թե «մեր նախնի սովորութիւնն այն է, որ մահաւառ անեն Սպահան և Ստամբուլ, որ այն է. քաղաքացիք միաբանին, և զմի ոմն ընտրեն և կացուցանեն: Ապա քէ ոչ՝ սուրբ Արքայի և կաթողիկոս նստողին մեծ վնաս կլինի, զիր ևս ունիմք այսպէս հաստատեալ բազմաց գրով և կնքով»⁸: Ուրեմն առանց այդ երկու քաղաքների քաղաքացիների համաձայնութեան (Կրետացին անշուշտ նկատի ունի խոջաներին և դովլաթլարներին), կաթողիկոսութեան թեկնածու չէին կարող առաջադրել:

Կրետացու պատկերացրած «նախնի սովորութիւնը» ընդամենը հարյուրամյա պատմություն ունեւոր և հիւրավի, հայ առևտրական կապիտալի երկու այդ խոշոր օջախներն իրենց վճռական խոսքն էին ասում հայ հասարակական կյանքի գրեթե բոլոր բնագավառներում: Այդ գիտակցել է Կրետացին և աշխատել այդ պատճառաբանութեամբ խուսափել կաթողիկոսությունից: Նա գիտակցել է նաև այն կարևոր հանգամանքը, որ սլաւոկա-թուրքական պատերազմների պայմաններում, երբ պատերազմական գործողութիւններն թատերաբեմը հիմնականում Արարատյան դաշտավայրն էր իր հայաշատ բնակչութեամբ, էջմիածնի գերը, իբրև հայոց հոգևոր կենտրոնի, պարսից արքունիքի համար խիստ մեծացել էր: Պարսից տիրակալները աշխատում էին ամեն կերպ ապահովել իրենց թիկունքը. փոփոխակի հաջողութիւնների պայմաններում տեղական բնակչության աջակցութիւնն ու ռազմական համագործակցութիւնը խիստ անհրաժեշտութիւն էր դարձել պարսիկների համար և ստեղծված պատմական կոնկրետ իրադրութեան մեջ այդ հնարավոր էր ստանալ հայերի հոգևոր կենտրոնի միջոցով: Անհրաժեշտ էր այդ կենտրոնը ծառայեցնել պարսկական պետութեան շահերին ու նպատակներին:

Ընդհատ է նշում Ն. Ղորղանյանը, որ Նադիրի՝ առաջին հայացքից բարեկամական թվացող հարաբերութիւնները Կրետացու հետ թելադրվում էին քաղաքական սիտուացիայով⁹:

Խորաթափանց Աբրահամ Կրետացին շատ լավ է ըմբռնել էջմիածնի և իր նկատմամբ արևելքի բռնակալի՝ Նադիրի, հետապնդած նպատակները և

⁶ Նույն տեղում, էջ 8:

⁷ Նույն տեղում, էջ 10:

⁸ Նույն տեղում, էջ 9:

⁹ Տե՛ս Абраам Кретацц, Повествование, Предисловие, էջ 7:

իր հերթին աշխատել է օգտագործել այդ հանգամանքը հայոց կաթողիկոսության վիճակի բարելավման համար, քանի որ այն գտնվում էր ֆինանսական-տնտեսական ծանր դրության մեջ: Գտնվելով տասնամյակների հարատևող պատերազմական զործողությունների կիզակետում, էջմիածինը հաճախակի էր կողոպտվում մերթ թուրքերի, մերթ պարսիկների կողմից, նրա գոյատևման միակ միջոցը՝ բռնակալների կաշառք տալն էր դարձել, սակայն հնարավորությունները վաղուց սպառվել էին և էջմիածինն ընկել էր ծանր պարտքերի տակ: Կրետացին ասում է. «վասն պակասության փողից՝ որս ոչ գոյր ամենեկին, խսկ վանից ծախքն բազում և անթիւ, յոյժ վշտանայի, տառապէի... ևրբեմն ի հողոյ արդևանց վաճառելով, ... և երբեմն փոխ առնելով, մինչ զի բազում պարտք արարի մինչև ցայսօր. և այսպէս տանջանօք և խղճութեամբ կառավարեցի զսուրբ Աթոռն»¹⁰: Վերը նշված հանգամանքի գիտակցումը թևավորել էր Կրետացուն, պահանջկոտ ու հանդուգն էր դարձրել նրան, և նա առիթը բաց չի թողել այն ծառայեցնելու մայր աթոռի շահերին, որքան հնարավոր է շատ արտոնություններ կորզելու գիշատիչ բռնակալից:

Ղարսի վրա արշավելու նախօրյակին Նազիր խանը այցելել է էջմիածին: Կրետացին ըստ պատշաճի պատասխանել է նրա հարցերին: էջմիածնից դուրս գալուց առաջ Նազիրն իր մոտ է կանչել Կրետացուն ու ասել. «Մի՛ հոգար, և մի՛ տրտմիր, և բնաւ մի՛ երկնչիր, այս օճաղս մեր է, և դու մէկ եախշի ծեր մարդ ես, տունդ աւատան լինի. իբրու ասել է թե՛ սունդ շէն լինի»¹¹: «Այս օճաղս մեր է»-ի իմաստը բացահայտում է նաև Երևանի փառան: Կրետացին գրում է, թե ևրբ ինքը նրա մոտ հրաժարվել է կաթողիկոսական պաշտոնից, պատճառարանելով. որ առանց Սուհանի և Ստամբուլի քաղաքացիների համաձայնության հնարավոր չէ կաթողիկոս ընտրել, վերջինս բարկացել է իր վրա և ասել, թե դա ևրկար կտեսի. «Ահա ևրկուց կողմանց զօրք և պատերազմունք երկին, և էջմիածին ի վերայ ճանապարհին է, մինչև ցայն օրն վանքն պիտի քակուի, և միաբանք անգլուխ գոլով մինն ոչ մնայ. այլ ցրուին, ալնուհետև ի՞նչ օգուտ է ձեր ընտրութիւնն: Գնա՛. ահա հրամեցիքեզ, և յանձն առ, և ըստ օրինաց ձերոց կատարեսցեն զկարգ կաթողիկոսութեան ի վերայ /ձերյ/, և կառավարեալ զայն թեքքէն: Զի ոչ միայն ձերն է, այլ մեր թագաւորին է, և մեզ ասպնջատեղ և պիտանացու...»¹²:

«Յետ այսորիկ մտածեցի,— գրում է նա,— վասն ևրկրին աղատութեան և տառապանաց. զի փողն կարի յոյժ նուաղեցաւ և քարշեցաւ, և զրեթէ իսպառ հատաւ: Վասնորոյ խնդրեցի... խանէն՝ տալ հրաման վասն դառապխանային բանալոյ յերևան և արդ արարի վասն Մելիք Յակոբջանին»¹³:

Ապա խնդրել է, որ նահանգի քալանթարն ու մելիքն առանց իր գիտության արքունիքից պահանջվածը (դրամ թե մթերք) չբաժանեն նահանգի գյուղերի ու քաղաքների վրա: Խանի հրամանով վերականգնել է մայր աթոռի մուքադարական իրավունքը 7 գյուղերի նկատմամբ (հիշատակարանում Կրետացին թվում է այդ գյուղերի անունները): «Այլև խնդրեցի,— շարունակում է Կրետացին,— զրախամ մի, զի մի ոք եկեալ նեղացուցէ զնոսա

¹⁰ Նույն տեղում, էջ 10:

¹¹ Նույն տեղում, էջ 15:

¹² Նույն տեղում, էջ 9:

¹³ Նույն տեղում, էջ 26:

դիւղական գոլով. նա և առանց իմ գիտութեան՝ գիւղորայից քատխոտայք թէվճիճ (բաժանում—լ. Բ.) մի ձգեսցեն ի վերայ աղքատաց. զի շար սովորութիւն ունէին, որ զբեռս իւրեանց ի վերայ աղքատաց շրջէին»։ Կաթողիկոսը նշում է, որ այդ հրովարտակը ստացել է և ուրիշ հրովարտակներ էլ է խնդրել։ Ընդհանուր թվով «առեալ եմ մինչև ցայսօր ավելի քան զլեւ բախում»¹⁴,— գրում է Կրետացին։

Թե այդ «բախումները» նա ի՞նչ դնով է ձեռք բերել և փոխհատուցման ինչքա՞ն։ և ի՞նչ միջոցներ է ծախսել, չհաշված առատածեռն նվերները՝ «զծիանքն և զշորիքն, և զայլ պատրաստութիւնս»¹⁵, այդ մասին նա ոչինչ չի գրում, եթե չհաշվենք մի քանի փաստերի ակնարկումը, այն էլ ոչ կաթողիկոսութեան հետ առնչված, և դա պատահական չէ։ Փոխհատուցման մասին զրելը կվնասելու Նադիրի և իր հետապնդած նպատակներին։ Ստեղծված կոնկրետ պայմաններում Նադիրին ու նրա իշխանավորներին անհրաժեշտ էր հայոց հողևոր պետից կորզել ոչ այնքան նյութական միջոցներ, որքան բարոյական օժանդակութիւն ու օգնութիւն։ Նրանք ցանկանում էին, որպեսդի կաթողիկոսը ժողովրդին պատմի հայ եկեղեցու և իր նկատմամբ նրանց ցուցաբերած «հոգատարութեան», տրված արտոնյալ վիճակի մասին, քարոզի ու աղոթի նրանց համար, «օրհնութիւնս և զփառաբանութիւնս և երկրպագութիւնս»¹⁶ մատուցանի։ Այսպես, օրինակ, Թավրիզից էջմիածին վերադառնալու և Իբրահիմ խանի ու Նախճավանի խանի՝ իրեն ցույց տված պատվի կապակցութեամբ կաթողիկոսը գրում է. «Ընդ առաջ ելեալ էին ամենայն միաբանքն և գյուղականքն մեծ պայծառութեամբ. էին անդ ի գեղն և ի օսմանցոց (իմա պարսիկ և թուրք—լ. Բ.) բազումք, որք տեսեալ զպայծառութիւն հաւատոյս և արարողութեանց մերոց՝ հիացեալ ապշեալ զարմանային որ և մտեալ մեր ի սուրբ տաճարն մեծի ընդհանրական Կաթողիկէի... անկեալ առաջի սրբոյ Իջման տեղոյն, զանշափական օրհնութիւնս և զփառաբանութիւնս և զերկրպագութիւնս մատուցանելով, ուրախութեամբ և արտասուօր ծանուցաք բոլոր միաբանից՝ և պատրաստ եղելոց, յորմէ իսպառ լցեալ էր եկեղեցին մարդկամբք՝ ի մերազգեսց և յայլազգեսց, զպատճառ, խնդրելոյն զմեզ՝ և մեր գնալոյն, զպատիւն, և զյուսադրութիւնն՝ զոր արար մեզ (Իբրահիմ խանը—լ. Բ.), յորմէ լսողք հիացեալ զարմանային և փառս տային աստուծոյ. և ապա աղօթս արարեալ և օրհնութիւնս տուեալ արծակեցաք ի խաղաղութիւն»¹⁷։ Ահա թե ինչն էր առաջին հերթին հարկավոր աշխարհակալութեան ձգտող Նադիրին ու նրա արքունիքին։ Ավելին, Նախճավանի խանը և միրզա Հասան աղան քիչ է մնացել Կրետացու համար հրապարակի մեջ ծեծեն իրար, նա գրում է, թե խանը իրեն հրավիրել էր Նախճավան, երբ ինքն իր մարդկանցով, թվով 30 հոգի մոտեցել են քաղաքին, խանը և միրզան 200 «ներեկներով» ձիերը հեծած դիմավորել են և մեծ շուքով տարել են քաղաքի մի «թէատրոնանման տեղ», ուր անթիվ մարդիկ են հավաքված եղել և սպասել են իր գալուն։ Երբ ժամանել են այդտեղ, խանը Կրետացուն հրավիրել է իր պալատը, սակայն միրզան թույլ չի տվել գնալու «և ի շատ մաքառելն,

¹⁴ Նույն տեղում։

¹⁵ Նույն տեղում, էջ 33։

¹⁶ Նույն տեղում, էջ 89։

¹⁷ Նույն տեղում։

իջան ի ձիոցն, խանն քաշէր իւր կողմն և Միրզէն քաշէր իւր կողմն. և յորժամ տեսի՝ թէ աճի կռիւն և կամին զմիմիանս յանդիմանել, զի մինն խան է և միւսն թագաւորի վեքիլ... Վասնորոյ վաղվաղակի իջալ ի ձիոցն, և մտեալ երկոցունց մէջ՝ աղաչեցի... հաղիւ կարացի դադարեցուցանել ի վիճմանց...»¹⁸: Սկզբից իր մարդկանցով ղնացել է խանի մոտ, հետո հրեք շաբաթ մնացել է Հասան աղայի մոտ:

Կրետացին քիչ ջանքեր չի գործադրել օգտակար լինելու իր ժողովրդին, հնարավորութեան սահմաններում զերծ պահելու նրան հալածանքներից ու կողոպտուից, ֆիզիկական ոչնչացումից: Պատահական չէ, որ նա նադիրին ասել է, թե «մենք վասն Բ իրաց ձեզ ծառայութիւն կանենք. մին վասն հաւատոց մերոց, զի յայտնի պաշտեսցուք զհաւատս և զքրիստոնէութիւնս, և միւս՝ զի պահեսցուք անարատ զսիրաթս ընտանեաց մերոց»¹⁹:

Մուղանի դաշտում եղած ժամանակ նա բազում գերիներ է աղատել, ուղարկել էլձիածին, Աստապատ, Ագուլիս²⁰: «Կրկին թափեցի ի դերեացն որբան որ կարողացայ. և կարացի հնարել և դտանել, փոխ ստակ առի և տուի գին գերեացն...»²¹: Հացի խիստ սղութեան պայմաններում պատվիրել է Ագուլիսում ալդ ժամանակ գտնվող Աղվանից ներսես կաթողիկոսին, հոգալ գերութեանից փրկվածների կարիքները: Ի դեպ, վերջինիս մասին Կրետացին գոհունակութեամբ նշում է, թե «ինչ գրէի, վաղվաղակի տայր կատարումն»²²: Ներսեսին նա իր տեղապահն է համարել, «վեքիլն ու նալիպը», և նրա համար էլ արտոնութեաններ է ստացել նադիրից: Կրետացին գրում է, թե Գյանջայի խաներն ու իշխանավորները «միշտ շամաթայ շլթաղ (զրպարտութեան — Լ. Բ.) անելով, ոչ տան թոյլ հանգիստ մնալոյ, այլ միշտ կեղեքեն և կողոպտեն: Վասնորոյ խնդրի ի մեծութենէդ, որ յայսմհետէ ոչ խան, ոչ սուլթան կամ Զապութ՝ նորա հետ բան չունենան, զի իմ վեքիլ և նալիպ է, այլ թէ խօսք և զրոյց ունին, ընդ իս տեսցէն»²³: Այդ հրովարտակը նա ստացել է ու տվել Ներսեսին:

Կրետացին հիացմունքով է խոսում խնձորեսկցիների մասին, որոնք ամրանալով քարայրներում, որ նա «հիանալի բան» է համարել, հերոսաբար դիմադրել են թուրքերին և Ղարաշաուլի քրդերին: Միաժամանակ դառնացած գրում է, որ խնձորեսկը առաջ ունեցել է 500 տուն, իսկ իր տեսած ժամանակ քարայրներում դրա կեսն էլ չի մնացել, «զի բազումս սպանեալք էին ի թուրքաց»: Կրետացին ավելացնում է, թե «փաշայք զօրոք իւրեանց քանիցս անգամ եկեալ էին ի վերայ նոցա, և ոչ կարացին մուտ առնել, այլ պատերաւդեալ ընդ միմեանս՝ յետ դառնային ամօթով»²⁴:

Ասվեց, որ Աբրահամ Կրետացին արժեքավոր տեղեկություններ է հաղորդում պարսկական պետութեան վարչակարգի մասին: Նա գրում է, թե պարսից սովորութեանն էր, մանավանդ նադիր շահի տիրապետութեան ժամանակաշրջանում, որ ամեն մի քաղաք երեքական մարդ նշանակի արքուն-

¹⁸ Նույն տեղում, էջ 88—89:

¹⁹ Նույն տեղում, էջ 86:

²⁰ Նույն տեղում, էջ 64:

²¹ Նույն տեղում, էջ 66:

²² Նույն տեղում, էջ 64:

²³ Նույն տեղում, էջ 74:

²⁴ Նույն տեղում, էջ 74—75:

նական եկամուտների ու ծախսերի վրա հսկելու նպատակով: «Առաջնոյն ասեն միրգէ վլէիլ, որ է զապիթ միրի յի հետ իլախայ ունողաց վերայ. և է երիցն մեծ հրամայող՝ և ի վեր նստող քան զմիւս երկունսն, և սա է առնող տուող և դատաստան անող՝ որպէս մեծ տէֆթէրտար, բայց ոչ առանց միւսոցն գիտութեան, այլ համակամութեամբ: Երկրորդին ասեն՝ Կէզիր, որ է միջինն և ունի զտէֆթէրն նահանգաց, և ամենայն եղեալ կելուրի և կիտուրի, իրաւի և մասութի (եւեմուտք—Լ. Բ.): Եւ զերրորդն ասեն՝ միրսօֆի՝ որպէս թե տէֆթէր էմի, որ զամենայն տէֆթէրներն նա ունի, և «Արքունի տէֆթէրին շինողն է. և տեղն ի տեղ գիւղորայքն և պէկլիկ Լղած մուլեր նորա գիտութեամբն է և նորա ձեռին»²⁵:

Կրետացին որոշ տեղեկություններ է հաղորդում ջիւլիեի—գլխահարկի ծանր լինելու մասին: Գրում է, թե իրեն դիմել են շամախեցի երկու քահանա և հինգ-վեց իշխան, խնդրելով միջնորդել շամախեցիների համար այդ հարկը թեթևացնելու մասին, քանի որ «շատ պահանջէին, խնդրեցին առաջի սահմանին՝ տնով մարդու՝ Գ ղուշ և կէս»²⁶:

Կրետացին նշում է նաև վարչական մի քանի այլ պաշտոնյաների անուններ՝ սնուհուտար, բախամլար, մալաբալաշուրուն կամ սահապալար²⁷ և մուլապաշ²⁸, էլիաղանլի²⁹: Առաջինը նշանակում է կնիք պահող—կնքապահ, երկրորդը՝ բախամներ—հրովարտակներ զրող, «այլ և ի վերայ գրողաց՝ սրբագրող որպէս ուշիգ» (ռալիս՝ պետ—Լ. Բ.), երրորդը՝ «դրամափորձ, պետ՝ որ ուղղէ զժամացոյցս, և կշռեալ փորձէ զդրամս հրահալելիս»³⁰, չորրորդը՝ օրենսգետների գլխավոր—պետ, հինգերորդը՝ շահին անմիջապես սպասարկողներ—խաների որդիները³¹:

Հետաքրքիր են նաև Կրետացու հաղորդումները Նադիրի պահակազորքի կազմի, նրա ռեժիմի, հանդերձանքի և սպառազինման, ինչպես նաև հրամանատարների ռոճիկների շափերի մասին: Ըստ այդ հաղորդումների, պահակազորքը բաղկացած է եղել 7 հազար հոգուց: Յուրաքանչյուր օր պահակ են կանգնել 2 հազար զինվոր, որոնք 24 ժամ կանգնելուց հետո 2 օր հանգըստացել են, նրանց փոխարինել է երկրորդ երկհազարյակը, սրանց էլ՝ երրորդը: Այնուհետև գրում է, թե մյուս հազարը կաղմել են՝ 350 սպասավոր նժույգածիղները, 350 հանդերձապահները, 350 էլիաղաճիկները իրենց տասնապետներով ու հիսնապետներով: Հազարապետի ռոճիկը տարեկան եղել է 20 թուման, հիսնապետինը՝ 12 թուման և տասնապետինը՝ 6 թուման³²:

Այնուհետև պատմագիրը տալիս է պահակազորքի ու ողջ բանակի հանդերձանքի ու զենքի նկարագրությունը, գովեստով է խոսում հատկապես պարսկական հեծելազորի մասին: Նկարագրելով Եղվարդի ճակատամարտն ու պարսիկների հաղթանակը, Կրետացին գրում է, որ ինքը դրանից երեք օր հետո եղել է ճակատամարտի վայրում և իր աչքով տեսել նրա ողբերգական

25 Նույն տեղում, էջ 59:

26 Նույն տեղում, էջ 65:

27 Նույն տեղում, էջ 70:

28 Նույն տեղում, էջ 68:

29 Նույն տեղում, էջ 60:

30 Նույն տեղում, էջ 119:

31 Նույն տեղում, էջ 60:

32 Նույն տեղում, էջ 72:

վախճանը թուրքերի համար: «Ճանապարհին հանդիպեցայ դիականցն, սկսեալ ի Աշտարակայ հանտէն մինչև ցնդեարդ՝ անթիւ բազմութեան սպանելոցն. և դեռ ևս կային ոմանք կենդանի, որ և խուզէին Պարսիկք զայնպիսիսն և սպանէին, որպէս և տեսայ աչօք իմովը մինչ դնայի ի ճանապարհին. որ և վերայ հասայ հալու մի կիսամեռի՝ մինչ կամէին մահացուցանել, և թափեցի ի ձեռաց նոցա. և զիմ շաթիր Պօղոսն ի հետ եղի բառնալով ի վերայ գրաստու, և հետո տանել ի յԱշտարակ ի խուցն եկեղեցոյն. և պատուիրեցի՝ զի քահանայք հոգ տարեալ խնամք տարցեն, որ և դտեալ զառողջութիւն... այլ և բազում վիրաւորեալք որք զերծան ի պատերազմէն, եկին երկրորդ օրն ի յէջմիածին, թուրք, հայ, հոռոմ, և բազմաց զեղ առնել հետու, ի զիշերով զտաճկունսն յուղղոյ եղինք յԵրևան, և այլք ի մերայնոց և ի Յունաց, ոմանք մեռան և ոմանք առողջացեալ գնացին ուր և կամեցան»³³, — գրում է նա:

Պատմագիրն իր հիշատակարանում զգալի տեղ է հատկացրել Մուղանում Նադիրի թագադրման արարողութիւնների և պարսկական կրօնական տոնի—բայրամի, ծիսակատարութիւնների նկարագրութեանը, որ հետաքրքիր է պարսիկների նիստուկացի ու բարբերի ուսումնասիրութեան առումով:

Աբրահամը, հայ եկեղեցու շահերից ելնելով, միտումնավոր ձեռով ձգտել է Նադիրին ներկայացնել իբրև քրիստոնեաւեր, հայերին ընդառաջող, իր և կաթողիկոսութեան նկատմամբ բարյացակամ տրամադրված ու հոգացող անձ: Միաժամանակ նա մի քանի նախադասութեամբ, բայց չափազանց դիւրով կերպով բացահայտում է Նադիր բռնակալի դաժանութիւններն ու նրա պատճառած արհաւիրքները և անարդանքի սյունին է դառնում նրան հենց իր՝ Նադիրի բերանով: Հիշատակարանում ասված է, թե Մուղանում Նադիրը խորամանկութեամբ դիմում է հավաքված իշխանավորներին, ասելով թե՝ «ընտրեցէք ի ձէնք զայլ ոմն, կամ ընտրեցէք զայլ մի՝ որ կարիցէ կառաւարել զձեզ և զերկիրն. և ի ձեռք վեր առէք ինձմէ... և շատ անգամ հրաժարէր: Բայ խաներն ստիպէին, աղաչէին, շողոմօրեալ աղերսէին, և հաւանեցուցանէին... պատասխանի հետ... Վալինամաթն (Նադիր—Լ. Բ.) և ասաց... բազումք ինձանէ պետամաղ են եղեալ, և իրաւունս ունին, զի բազմաց ապրանս խլեցի. զբազումս մահացուցի, զոմանս կորուսի. և յոլովից զոսկին և զաւթաքն խլեցի, և շատ տեղիս անեցի և զերկիրս սասանեցուցի և աղքատացուցի, վաւերօրոյ բաւական է այս չափս, թո՛ղ հանգչին մարդիկ՝ զոնէ յայսմանէ ի նեղութենէ յայսմանէ»³⁴: Իր այս բնութագրումով, ուր մեր առջև հառնում է արեւելքի իսկական բռնակալ Նադիրը, Աբրահամ կաթողիկոսը հօդս է ցնդեցնում Նադիրի՝ իր իսկ ստեղծած միտումնավոր, կեղծ պատկերը: Այս մի քանի նախադասութիւնն են երևան բերում իսկութիւնը, դրանք են, որ տալիս են բռնակալի ու նրա իշխած ժամանակաշրջանի ճիշտ ու օբյեկտիվ պատկերը: Չմոռանանք, որ Աբրահամ Կրետացին այլ կերպ չէր կարող վարվել. նրա կողմից Նադիրին իդեալականացնելը թելադրված էր օրվա պահանջով և որոշակի նկատառումներով: Հայ պատմագիրների մոտ Հայաստանի բռնակալներից և ոչ մեկը իր բերանով նման ինքնախարազանում չի արել: Մեր պատմագիրները անարդանքի սյունին են դառնել միայն մահկանացուները կնքած բռնակալներին, մինչդեռ Կրետացին այդ տողերը գրել է ոչ միայն

³³ Նույն տեղում, էջ 191

³⁴ Նույն տեղում, էջ 541

Նադիրի կենդանություն, այլև փառքի օրերին, ինչպես խաներն են Մուղանում Նադիրին, Կրետացու խոսքերով ասած, «շողոթորթեալ աղերսէին», այնպես էլ ինքն է, ահի ու սարսափի տակ հարկադրված «շողոթորթեալ» գովերգել նրան՝ դարձնելով «երկրորդ Ալեքսանդր»։ Սակայն միաժամանակ խիղախություն է ունեցել այդ մի քանի նախադասությամբ ընթերցողին հասկացնելու, որ իրողությունը Նադիրի բերանով ասվածն է, և ոչ իր շռայլած գովերգումը։ Նկատենք նաև, որ Կրետացու գովքը Նադիրի գրաված դիրքի գովքն է և ոչ նրա կատարած գործերի։ Ընդհակառակն, երկրի ներքին կյանքի, ժողովրդի վիճակի նկարագրություններում խոսվում է այն մասին, որ ամենուր հացի, ուտելիքի սղությունն է տիրել, գյուղացին չերւմ չի ունեցել ցանելու, քարշող ուժ չի ունեցել վարուցանք անելու համար, ճանապարհներն անապահով են եղել, անգամ իր՝ Կրետացու ձին են գողացել³⁵։ «Եւ ոչ եթէ միայն ի Մուղան էր նուազութիւն հացի,— գրում է Կրետացին,— այլ յամենայն տեղիս Թավրիզում՝ և ալսր՝ և ի Տուղախ, ի Կէնճէ, ի Ղազախ, ի Լօռի, ի Վրացտուն, ի Գեղամայ ծովի եզերայքն, ի Մաղկնուձորն, ի Ղափան, ի Նախիջևան և յԵրևւան... յետի օրերն թանկացաւ ցորեանն և գարին ի Մուղան, և եղև Թավրիզի լիտրն Ա զօլաթա (երեսունանոց) և Ժ թիմին, որ է Թճ դրամ. և ի փետրվարի իԱ... վասն ճէղիէին, զոր շատ պահանջէին, խնդրեցին առաջի սահմանին՝ տնով մարդուն՝ Ի դուշ և կէս»³⁶։ Նա դառնացած գրում է, որ Շամախին ավերելուց հետո Նադիրը հրամայել էր կենդանի մնացած շամախեցիներին բնակեցնել մի շատ անբարենպաստ տեղում, ուր օդն ապականված էր, ջուրը քիչ, և ավելացնում է. «Տաճկունք՝ որք են Լակղիք և Սուննիք՝ վշտացուցանէին և տառապեցուցանէին զԱղզն մեր»³⁷։ Այնուհետև գրում է, որ նրանք իր օգնությունն են դիմել և ինքը ստիպված է եղել դիմել շահին, խնդրելով նրանց նոր բնակավայր շինելու համար տեղ հատկացնել, ջիղիեն պակասեցնել և նեղիշներին սանձահարել³⁸։

Այսպիսով, Կրետացու Նադիրին տրված «մեծախելք», «հանձարեղ» պիտակներն օգից կախված են մնում, իսկ ինչ վերաբերում է «մեծաբախտ», «մեծազոր» պիտակներին, ինչպես նաև «երկրորդ Ալեքսանդր» հորջորջմանը, ապա դրանք հանդիսանում են Նադիրի՝ պատերազմներում ձեռք բերած փառքի ու դրա շնորհիվ ստեղծած ահ ու սարսափի մթնոլորտի ազդեցության տակ տրված «շողոթորթեալ» մեծարումներ։ Որ իսկապես Կրետացու կողմից Նադիրի իդեալականացումը շողոթորթյալ գովերգություն է եղել, ընթերցողին համոզում է նրանից մոտ 50 տարի հետո գրված «Պատմութիւն Պարսից» երկի հեղինակ խաչատուր Զուղայեցին։ Այդ գրքում կարդում ենք. «Արդ՝ երանի քէ Նաուր արքայն քստ հաւասար քաջութեան իւրոյ՝ բարոյական առաքինութեամբ պերճացեալ իցէր և բարգաւանեալ... բայց նա այնքան շափազանցարար ի յանողորմութիւնս և յամբարտաւանութիւնս հակեալ ձգտեցաւ մինչ զի ասեմ քէ՝ նա երբեմն զգալս անբան՝ սաստկապէս տուժեաց տուժանով»³⁹։

35 Նույն տեղում, էջ 66։

36 Նույն տեղում, էջ 65։

37 Նույն տեղում, էջ 66։

38 Նույն տեղում։

39 «Խաչատուր արեղայի Զուղայեցոյ Պատմութիւն Պարսից», Վաղարշապատ, 1905, էջ 272—273։

Խաչատուրը Նաղիրի՝ Կրետացու վկայած ինքնախարադանումն այլ ձևով է ներկայացնում, ասում է, թե մի անգամ Նաղիրն իր մեծամեծներին հավաքել ու ասել է. «Ահա դուք արքանողորմք և խիստք, և ես ի վերայ ձեր պատիվ և պատուհաս ի տէառնէ առաքեցեալ: Ուրեմն՝ ասէ՛ մի ոք այսուհետև դիս պախարակեալ հեզնեսցէ որպէս թէ ես իցեմ վատ և անողորմ, — Խաչատուրն անմիջապէս բացականչում է, — Ա՛հա արդարև նշմարիտ վնի՛ր՝ որ զնմանէ արտադրեցաւ առ նոսա»⁴⁰: Ասպա նա ավելացնում է. «...այսուհետև զսկզբնսուրեցաւ շար բոնակալութիւն նատրր արքայի, որ բռնակալութիւն աղուանից աղղին»⁴¹ առ որով համեմատելով՝ թեթեւոյն գտանի, և նորայնն յոյժ ծանրագոյն»⁴²:

Կրետացին չի վրացել ցույց տալու «արի», «մեծախելք», «մեծաբախտ» Նաղիրի խոսքի և գործի միջև անհամապատասխանությունը: Նույն Նաղիրի հրամանով, որ Թիֆլիսում իր մեծամեծներին ասել էր, թե «չի լինի թէ նեղացնէք դադոս Հայոց՝ կամ վնասէք», հենց նույն ժամանակ Թիֆլիսից 300 հայ ընտանիք պետք է բշխէր Խորասան, նույնքան էլ՝ Արարատյան նահանգից: Այդ կապակցութեամբ Կրետացին գրում է. «Բոնութեամբ հանեալ ի բնակութենէ իւրեանց բշխին ի Խորասան»⁴³: Թիֆլիսեցիները մասին գրելիս նա նշում է. «Բազումք որ լսէին զգնալն և զգրաւիլն իւրեանց, գային յեկեղեցին՝ յորում ասպատանեալ էի, և կական բարձեալ ողբային և աղաղակն յերկինս ելանէր. լային, գոռային, գոշէին, յերկիր անկեալ թաւալէին և աղերսէին, զի խնդրիցեմ ի խանն աղատել զնոսա, և մի վարել ի յօտար երկիր: Իսկ տառապեալս տեսանելով զաղետս ժողովրդեան՝ արանց և կանանց, փրկեալ այրեցեալ սրտիկս, և արեան արտասուս իջուցանէի, և դեպերեալ աստանդական ի դրունս մեծամեծաց՝ պաղատէի, աղաչէի, հայցէի, և աղէրսէի աղատիլ նոցա ի յայն վշտաց: Որ և... ի պատճառէ իմեքէ՝ քաղցրացաւ սիրտ խանին, և եթող զնոսա: Բայց ԳՌ. թուման, և ԳՌ. սօմար ցորեան, որ և ժողովեալ հասուցին և զերծան»⁴⁴: Նաղիրի սիրտը քաղցրացել է ոչ թե «ի պատճառէ իմեքէ»-ից, այլ ստացած կաշառքից: Սակայն նա, ով կարողացել էր նշութեական փոխհատուցում տալ «բարերար» շահին՝ իր խնդրանքը չմերժելու համար, հաշիւ էր առել Թիֆլիսեցիների նշութեական հնարավորությունները, մի բան, որ չէր կարող անել արարատցիների կապակցութեամբ, քանի որ նրանք ի վիճակի չէին այդչափ փոխհատուցում տալ ու փրկվիլ: «Նոյնպէս և վասն Արարատու երկրին 3 (70) տանն շատ և անխոնջ տանջեցայ և տառապեցայ, և ոչ եղև հնար...»⁴⁵, — դառնացած գրում է Կրետացին:

Կրետացու մի վկայութիւնն այն մասին, թե Նաղիրն իր նախկին գրադրին կարգել է պատմարան՝ «գրել զպատմութիւն եղելոց իրաց՝ և վասն ինքաւորելոյն իւր»⁴⁶, հիմք է տալիս երկու հավանական ենթադրութեան հանգելու. մեկը, որ իմանալով այդ մասին, Կրետացին ինքն է շտապել այն գրելու, մյուսն այն, որ այդպիսի պատմութիւն գրելու պատվեր թերեւս նա ստա-

40 Նույն տեղում, էջ 271:

41 Խոսքը Աֆղանների մասին է (Լ. Բ.):

42 Նույն տեղում, էջ 272:

43 Նույն տեղում, էջ 25:

44 Նույն տեղում:

45 Նույն տեղում:

46 Նույն տեղում:

յեւ է հենց նաղիրից և ուր վերջինիս պահանջով է նա իր գրվածքի մի օրինակը և կոնդակը ուղարկել Պոլսի պատրիարքին և Ադրիանապոլսի մահտեսիներին՝ արևմտահայության իշխող վերնախավի մեջ էլ վստահութուն ձևաբերելու և մեծարվելու նպատակով:

Աբրահամ Կրետացու թողած ծավալով փոքր, բայց պարունակած նյութով արժեքավոր անձնական հիշատակարանը կարևոր աղբյուր է Հայաստանի և Պարսկաստանի XVIII դարի 30-ական թթ. պատմության ուսումնասիրության և նաղիրի ու նրա ժամանակաշրջանի մասին ճիշտ պատկերացում ունենալու համար:

АБРААМ КРЕТАЦИ

Доктор историч. наук Л. О. БАБАЯН

(Резюме)

В статье показывается, что «Повествование» католикоса Абраама Кретацци представляет собой важный источник для изучения истории Армении и Ирана 30-х гг. XVIII в. В этом сочинении Кретацци описывает свою жизнь в течение двух лет, богатых политическими событиями, свои встречи с Надир-шахом, привилегии, полученные Эчмиадзинном от него, свое путешествие в Муган. Подробно описывается коронация Надир-шаха в Муганской степи и сопровождавший ее персидский религиозный праздник байрам. Сочинение Кретацци содержит интересные сведения об этикете персидского двора, системе управления, о персидской армии и ее вооружении, тяжелой налоговой политике и ее последствиях, о правах и обычаях персов, а также о персидско-турецких войнах, в особенности о битве при Егварде в 1735 г.